

#  
12

DISSERTATIO MEDICA  
INAUGURALIS  
*De*  
PARALYSI

*Quam*  
Auxiliis Divinis  
DECRETO & AUCTORITATE  
INCLYTÆ FACULTATIS  
MEDICÆ

*In Illustri Argentoratensium  
Universitate*

Pro  
Summis in Arte Medica Honoribus  
& Privilegiis Doctoralibus  
legitime impetrandis

*Solenni & placido Eruditorum Examini  
submittit*

DANIEL WENCKER  
Argentoratenfis

♀ Ad d. 29 Aprilis Anni M DC XCV.

---

ARGENTORATI, Literis JOH. FRIDERICI SPOOR.



*AMPLISSIMO*  
*ET PRUDENTISSIMO*  
*VIRO*  
*DOMINO*  
**JACOBO**  
**WENCKERO**

CONSULARI AC TREDECIMVIRO  
REIPUBLICÆ PATRIÆ  
MERITISSIMO,

GENITORI OPTIMO,  
ALTORI BENIGNISSIMO,  
INSCRIPTIONE

*DISSERTATIONIS INAUGURALIS,*

GRATAM MEMORIAM  
AMORIS ET BENEFICIORUM  
PATERNORUM

PUBLICÆ TESTARI DEBUIT  
FILIUS OBSTRICTISSIMUS

**DANIEL WENCKER.**







## *Juvante DEO.*



**I**nter tot calamitates quibus

homo, dum Spiritum trahit, premittitur, propter quas non immerito miseram ac deplorandam omnium Mortalium vitam Siracides pronunciat, minimis haud accensendi veniunt Morbi; quippe qui magno dolore & cruciatu, tristi sæpiusque horrenda

facie, & quod pessimum, densis agminibus corpus humanum impugnant, debilitant, prosternunt. Quoniam autem horum quoque malorum gradus dantur, ex graviorum nunc numero (cum alias eo clarior Victoria esse soleat, quo durior conflictus fuit) seligemus PARALYSIN: affectum inter tot myriades hominum non usque adeo rarum, diuturnum, molestum, dumque facultates, quæ ad esse animalis faciunt, motum intellige sensumque, adimit, satis perniciosum. Quo nimirum partim SUPERIORUM decreto satisfaciamus; partim eo melius in posterum hocce laborantibus, vel curando, vel mitigando; aut, si hac spe excidimus, ne malum ulterius serpat, præservando, succurrere queamus. Institutum vero nostrum prosequuturi, tritam hætenus tenebimus viam, initium capiendo ab ipso **NOMINE.**



I. PARALYSIS resolutio, remissio, à *παράλυσις* quod est resolvi, Vernacula sine *λάρημε* audit.

II. Omnis autem quæ à ratione suscipitur de aliqua re dissertatio, debet à DEFINITIONE proficisci, ut intelligatur, quid sit id, de quo disputetur. Placet igitur, quoniam omnis disputatio de Paralyfi futura est, ante definire quid sit. Paralysis autem est sensus & motus, aut unius tantum in parte corporis læsio, ab impedito spirituum influxu, manente Sensu interno sive Sensu communi, Phantasia & Memoria.

III. Ab Apoplexia gradu saltem distare ex descriptione hujus facile patebit: dicunt enim esse motus sensus externi & interni subitanæ ablationem, à denegata spirituum Irradiatione, superstite respiratione afflicta. Paucis nunc attingendæ sunt DIFFERENTIÆ Paralysis, quæ deprehenduntur ratione SUBJECTI, Paraplegia enim dicitur, si capiti subjectæ partes resolvuntur, Hemiplegia, si alterutrum tantum latus. Particularis Paralysis, si specialis pars corporis ex. gr. oculus, lingua, manus, pes læditur. Ratione ACTIONIS LÆSÆ, Perfecta, si motus & sensus perit, Imperfecta si motus aut sensus tantum, aut si uterque solum minuitur, tum Stupor nominatur. Sub sensus vocabulo præter Tactum, etiam Visum, Auditum, Gustum, Olfactum, quatenus nimirum hebetiores redduntur, aut plane abolentur, comprehendere possumus. Ratione ORIGINIS alia nullo prægresso morbo obruit subito, alia quosdam affectus sequitur ex. gr. Apoplexiam, Colicam unde Paresis, Arthriditem, Scorbustum. Ratione CAUSARUM hæc ab Externis, illa ab Internis, & si quæ aliæ sunt levioris momenti.

IV. Ordo nunc postulat, ut de PARTE AFFECTA quædam dicamus. Hujus enim quam necessaria intuita quoque cognitio, non tantum ex eo apparet quod *Thomas Bartholinus Anat. p. 1.* in genere monet. *Neque quisquam Physicus esse aut dici potest, nisi hanc (Anatomiam) ante omnes*  
*Doctrinæ*



*Doctrina Physica partes ad unguem calleat. Sed specialius ostendit Insigne Germaniæ Decus Herm. Conring. in Art. Med. Introd. p. 186. Ante omnia sane ad morbi cognitionem pertinet, partis laborantis naturam intime habere perspectam, cujusmodi illa sit, quem usum actionemve præstet, quem situm in corpore obtineat, & deniq, ubinam lateat. Cum igitur Cerebrum, Medullam Spinalem & Nervos in hoc affectu, unanimi fere consensu partem affectam agnoscant Artis Medicæ Proceres, paucis delibabimus eorundem Historiam.*

V. CEREBRUM autem osseo castello munitum gemina membrana cingitur, crassiori prima, quæ in duas divisibilis est partes, quarum exterior validior, interior vero mediocris inter priorem & tenuem Meningem. Crassa fibris se mutuo oblique intersecantibus (ut in cocta manifeste apparet) conflatur, duos constituit duplicata processus, Falcem & alterum inter Cerebrum & Cerebellum; tenuis vero Meninx interiora quoque Cerebri investit. Tota Cerebri moles arteriis bigeminis irrigatur, Carotidibus & Vertebralis, quæ undiquaque se insinuant, totam ejusdem perreptant Substantiam, in osculatione quoque communicantes, quarum una inflata omnes turgent: dum Caput ingrediuntur, unam deponunt tunicam, tenuiores proinde ac in reliquo sunt corpore: hisce Cerebri & Meningum pulsus tribuitur. Sinus vero, fere arteriarum more pulsum iterantes, Sanguinem è Cerebri mæandris per venosa vasa admissum revehunt, inque Vertebrales & Jugulares internas deponunt Venas: numerantur Sinus plures ab Industrio Raym. Vieussano in Neurographia p. 15. Unde fit, inquit, ut asseramus crassam ejusmodi membranam octo semper, ut plurimum novem, & aliquando undecim donatam esse sinibus. Ipsum quod attinet Cerebrum dirimitur in Cerebrum specialiter sic dictum, Cerebellum & Medullam oblongatam: rursus hoc dividitur in duo Hæmisphæria: utraque denuo in partem Exteriorem Cineritiam sive Corticalem, & Interiorem Albam sive Medullarem. Priorem si lustramus, pridem liber iste de Glandulis qui Hippocrati



adscribitur, inter glandularum hanc retulit numerum: videamus igitur quomodo cum Recentiorum inventis hoc conveniat, & consulamus primo sedulum Cerebri Investigatorem Marcel. Malpighium p. 270. de Cortice Cerebri. In Sanguineorum igitur perfectorum animalium Cerebro, corticem affusum minimarum glandularum proventum & congeriem esse deprehendi: he in Cerebri gyris & protractis veluti intestinulis, ad quæ desinunt albæ nervorum radices, vel inde si mavis, oriuntur, ita ad invicem adaptantur, ut exterior cerebri superficies harum congerie efformetur. Figuram habent ovalem. Harum exterior portio contegitur pia matre, ejusq; sanguineis vasis, quæ alte penetrant illarum Substantiam; pars interior à se promit fibræ albam, nerveam, veluti proprium vas. Melius tamen in cocto apparere notat, atramento affuso & gossypio leviter deterfo; quod idem Vieussanus spiritu vini atrato peragit, insuperque memoratæ coctionis idoneum liquorem, oleum nimirum indigitat, quo illa lento igne est perficienda: periculo facto, eadem ratione res se obtulit; pars enim corticalis ac si granulis conspersa esset, apparebat, atramento asperso capitula minora ferè rotunda prominebant, ab his suspensa manu facta divulsione, oculis se fibrillæ albæ copiosissimæ sistebant: neque hoc simplici sed repetito experimento contigit. / Singulas glandulas vasculis præditas notat jam Celebratus Author p. 273. Hoc tamen aternum est, ut corticis singula quæq; glandula utrorumque vasorum extremis finibus irroretur. Hæc Sanguiflua exquisito Microscopio plane detexit Ant. à Leeuwenhock p. 42. Cerebrum ovis rimatus deprehendi similiter in corticosis partibus ingentem numerum tenuissimorum vasculorum sanguiferorum, quæ vascula quoque corticosis partibus subbrunneum colorem largiuntur. Hanc incomprehensibilem summe exiguorum sanguiferorum vasculorum multitudinem sapius oculis meis sum intuitus, videbam quippe singula ferè vascula iterum dehiscere in ramulos. Recens vero descripta Corticalis substantia, non tantum exteriorem superficiem constituit, sed alte quoque in Cerebrum mergitur, & in oblongatam usque medullam se insinuat; corpora striata,



friata, thalamique nervorum opticorum cum prominentiis natiformibus de hac participant. Hoc adhuc adjicere lubet, quod non in humano solum, sed aliorum quoque animalium cerebro hæ glandulæ deprehendantur, ita ut eadem sit omnium animalium structura, observante *Malpighio de Cerebri Cortice p. 270. & Leeuwenh. p. 47.* ita ut inter cerebra *Grandium & Parvorum Animalium*, nullum intercedat aliud discrimen, (exceptis majoribus sanguiferis vasis) nisi quod magnitudo illorum constat ex majori numero partium. Jam alteram Cerebri rimabimur partem, & quidem oculorum fidei adjungemus testimonia sæpiùs jam citatorum Anatomicorum. *Malpigh. de Cerebro p. 115.* nam constat evidenter totam hanc cerebri albam portionem divisam esse in fibrulas depresso rotundas & p. 116. eandem fibrosam naturam in pecudis bovis & similium tam crudo quam elixato cerebro observavi. Idem testatur *Vieussanus p. 109.* alba cerebri substantia innumeris è fibrillis simul connexis, ac veluti plures in fasciculos distinctis conflatur, quod aperte patet dum hæc in oleo excoquitur. Suum hic tribuit *Leeuwenh. p. 48.* quod attinet ad partes cerebri illas, quas medullosas solemus nominare, eas semper multis experimentis edoctus statui, magna ex parte ex minimis lineolis sive vasculis constare. Magnitudinem quoque circiter describere conatur p. 46. Maxima modo dictorum devehentium vasculorum videbantur mihi, quantum oculi judicare poterant, obtinere centesimam partem crassitie pili unius. Cerebelli eandem esse structuram supra recensitis testibus probamus; & iisdem partibus Medulla Oblongata constat. Ad Spinalem Medullam progredimur, quæ quatuor membranis sive involucris secundum *Vieussanum* tegitur, Canaliculis venosis, sinibus venosis, arteriis & venis spinalibus humectatur, duplici quoque substantia conflata est; alba seu Medullari externa; cineritia seu Corticali interna; ideoque inversa ac in cerebro ratione. Spinalem hanc Medullam nervorum fasciculum *Malpighium*, consentiente autopsia, si nimirum hujus portio in spiritu vini maceratur, nominat. A fonte ad rivulos nos conferimus i. e. Nervos, qui omnes fibrillis tantum



tum exceptis quæ à Medullæ Spinalis glandulosa substantia derivantur, Cerebrum & Cerebellum originem agnoscunt, satis etiam numerosa serie: ad triginta enim novem paria ab accuratiori horum Investigatore numerantur. Ex Medullosa Cerebri substantia Meningibus obvoluta conflantur, molliorum equidem integer fasciculus; duriorum vero quævis fibrilla tenui meninge investitur, venulis & arteriolis donantur: quod sectione majorum patet, dum sanguinem læsi stillant: manifeste tamen, ut quidam voluerunt, in homine excavati non deteguntur. Paucis monemus, quare sæpius laudatorum Malpighii, Vieussani integrum textum transcribere non dubitaverimus: scilicet in Neurographia aliis Illi facile palmam præripiunt, insimulque ponderosis rem verbis exprimunt. Quod ipsam partium Fabricam attinet, cuncta memorata, cum aliis universi corporis humani membris, studio & ingenio præparata & demonstrata persæpe vidimus, in Ornatissimo Theatro Anatomico hujus Universitatis, ab Amplissimo & Experientissimo Viro, Domino JOHANNE VALENTINO SCHEIDIO Med. Doct. & P. P. Celeberrimo, Patrono meo Magno.

VI. Cum extra omne dubium jam sit collocatum, Cerebrum ad glandulas, & quidem conglomeratas optimo jure posse referri; glandularum vero munus sit, secernere peculiare liquidum à massa sanguinea: idem certe ab hac nobili totius corporis parte, & quidem in gradu sublimiori præstatur. Fit enim secretio liquidi tenuissimi & nobilissimi, quod omnium ore SPIRITUS audit, & verosimiliter aëris alimentorumque subtilior pars & purior est. Peragitur autem dicta sequestratio in corticali Cerebri & Medullæ Spinalis substantia, actoribus arteriæ & sanguinis motu intestino, juvantibus cerebro renitente, conformatione particularum & pororum: Spiritus enim ex corpusculis sphaericis constare, non admodum ineptum videtur asserere, dum hæc scil. Sphaerica Figura facile est mobilis,

in



in quo naturam spirituum respondere omnes fatentur. Spiritus sic generatus non subsistit, sed motu arteriæ, cerebri, meningum & cranii renitentia, subsequente porro spiritu in nervos propellitur: hinc nunquam interruptus est ejusdem fluxus in universum corpus, tam in Organa motus, quam sensus: hoc saltem discriminis intercedit, inter motum ex. gr. Cordis, arteriarum, ventriculi, intestinorum &c. quem naturalem dicunt, quod nolente volente homine tamē peragitur, & ideo potestati nostræ non subiectus sua sponte absolvitur: & motum ex. gr. artuum ope musculorum (licet nulla pars mobilis, omni musciosa textura destituatur) Brachii, Pedis, quem animale sive spontaneum nominant, quod intendi aut remitti pro imperio Animæ potest: quamvis & hic quandoque non cogitante vel repugnante Ratione fiat, h. e. mere Mechanice.

VII. Priusquam ulterius progrediamur, cum aliquo-  
ties mentio MICROSCOPIORUM facta sit, horum  
vero apud plurimos suspecta sit fides: operæ pretium erit,  
paucis eorundem USUM tanquam utilem, jucundum &  
necessarium stabilire: neque quicquam nos movebit Triga  
argumentorum Kerckringi in Spicilegio Anatomico Obser. p. 93.  
Per Microscopia incertum in Anatomia iudicium. Centrum istius  
visionis esse minutissimum. Colores ita variare, ita rebus hac vi-  
dendi ratione affundi, ut quis earum nativus & verus sit, dyjudicari  
nequeat. Ea, quæ sic interpolatis visionibus percipiuntur, fieri posse,  
ut discreta appareant, vere unita & continua quæ sunt. Primum  
enim, si aperturam seu foramen per quod fit visio, intelli-  
git, usque adeo verum non semper deprehenditur: quippe  
in majoribus Microscopiis, (quæ ut plurimum adhibentur)  
apertura pupillæ oculi ferè respondet: deinde ad minima  
magno centro opus non est. Absit secundo, colores varia-  
re & peregrinos affundi, si per medium vitrorum visio in-  
stituitur, quin vividiores potius, ut periculum facturo pate-  
bit, nativi appareant. Tertium facile solvitur, si loco sunt  
poneremus videntur: quemadmodum enim quispiam o-  
culo



culo inermi longe distantem quadrangularem turrim rotundam, sylvas continuas, juga montium concatenata pronunciat; alter vero per tubum turrim quadratam, sylvarum arbores distinctas, juga montium ex pluribus à se invicem distantibus & per valla interruptis terræ gibbis observat: eodem modo res cum vere discretis & apparenter unitis se habet. Grato igitur spectaculo Maximum ex minimis istis cernimus, experientia insuper certi, non frustra condita esse ista minima, sed operandi vi maxima longe antecellere. Insigni nostro commodo legimus & data occasione imitamur elegantissimas Observationes Curiosissimorum Malpighii, Hooekii, Grevii, Rhedi, Leeuvvenhœckii &c. Et si vel unicum ingeniosum istud inventum PAPILLARUM CUTIS quod Microscopiorum usui debemus, existeret, sufficienter jam horum utilitas suffulta esset. *Malp. de externo Tactus organo. p. 203. Postremum examinanda occurrit Manus, in cujus vola elata quædam ruga diversas figuras describunt, in extremo tamen digitorum apice spiritaliter ducta, si microscopio perquirantur, patentia sudoris ora per medium protracti dorsi exhibent; ut autem interiora paterent, admoto candente ferro facile extrinsecus detraxi cuticulam, quæ striis subiecto corpori correspondet; & ubi sudoris excretoria vasa hiant, convexa quædam pellicula interiora versus non absimilis cucurbitula extenditur, ad edendum forte valvula ministerium, ut interdum tensa detineat sudorem, & laxata exitum permittat. Post hanc evellendum sese obtulit reticulare corpus, ejusdem altitudinis, ac alias in lingua observavimus, cujus crebris foraminibus continentur non solum sudoris vascula, sed innumera penè pyramidales papillæ; hæ autem emergunt à subiecta cute: sub protractis enim singulis rugis, quæ in cuticula, & rete protuberant, bini papillarum ordines paralleli per longum ducuntur, in quorum medio dispersa locantur sudoris vasa. Hæ igitur copiosissimæ papillæ, juxta morem è cute erumpentes tandem in cuticulam desinunt, & singule in plures veluti fibrulas dividi videntur. p. 204. l. c. Ex his & similibus videbatur animus abunde certior redditus, earundem papillarum pyramidalium copiam, quas alias in lingua*



lingua descripsi, in locis præcipue exquisitiori tactui dicatis reperiri, eodem progigni nervoso & cuticulari corpore, simulq; circumvolvi reticulari involucro, & extimam cuticulam, veluti ultimum terminum attingere, rursus in corporis etiam ambitu easdem conspici, minores tamen, sed prorsus eadem servata structura & situ. Eadem pagina. Ita ex copiosa harum papillarum proventu, & copiosiori, grandiorique earum congerie in organis, ubi maxime animalia tactus motione afficiuntur, ex earundem etiam propagine in reliquo ambitu, ubi tactus vires etiam exerit, adequatum tactus organum sufficienter haberi. / Taceo nunc plantarum earundemque germinis, figuræ salium, animalium minutissimorum, infinitarumque rerum speculationes. Notatu certe digna paulo ante laudati Malpighij verba in præmio de Renibus p. 278. nos instigare deberent. Nec hæreas, an nova vel vetera sint, sed an naturæ consonent prudentius queras, illud unum tibi spondens, me hanc rerum structuram librorum ministerio nequaquam assequantum, sed patienti, longo & vario usu Microscopij: & Carolus Fracassatus de Lingua p. 182. non absurdum credit Salium Figuras ad Microscopicum revocare criterium & dubitantes cum reclamantibus oculorum fidem adhibere jubet: cui merito annectimus Celeberrimi Bohnij verba in præfatione ad Laurentij Bellini de Urinis & Pulsibus. Quantum in partium corporis diversarum, tam solidarum, quam fluidarum, textura rimanda, Microscopia, olim nec visa, nec adhibita, Malpighij, Levvenhockij &c. profuerint, eorum hodie observata stupenda, olim inter non entia numerata edocent. Sedulus denique rerum Mundanarum Scrutator Joh. Christ. Sturmius in Collegio Curioso, postquam ipsemet varia hoc instrumento tentasset, denique Lectores monet, ut propria experientia uberiores Organi nobilissimi fructum percipiant. Et tandem, cur oculo imbelli subsidia denegamus, qui manus tamen in Anatomia cultellis, lancettis, stilis, hamulis & syringis armamus. Hoc tamen requiri fere videtur, quod parum in Mechanica & Optica sumus versati, quo vitra disponere, corrigere, depurare & si quæ sunt alia, eo facilius peragere queamus; alias enim nausea & tædium cito animis obrepit.



**IIX.** Sed quamvis exactissimam partis affectæ cognitionem habeamus, CAUSA vero morbi in abscondito latet, frustraneum vel ad minimum incertum est omne remedium: ita enim *Herm. Conring. L.c. p. 187. certe sine causa recta cognitione morbum integrum nemo pernoſcit, quum ſcire ſit rem per cauſſam cognoscere. Ut porro Medicus medeatur morbo, neceſſum eſt cauſam teneat, ſi non eam quæ primum produxit morbum, ſaltem illam quæ eundem fovet: utpote quum remedia cauſa morbiſicæ proxime & proprie adverſari debeant.* Hinc

*Felix, qui potuit rerum cognoscere cauſas!*

Cum autem bona conſtitutio Cerebri & totius corporis, in debita mixtione & fluiditate ſanguinis, aut partium fluidarum; legitimaque conformatione & ſtabilitate vaſorum, ſeu partium ſolidarum conſtet, quæcunque hæc talem in modum offendunt, ut ſpirituum influxus ad motum & ſenſum neceſſarius ſufflaminetur, Paralyſin producent. Cauſæ propterea omnium calculo ſunt **EXTERNÆ & OCCASIONALES**, ær frigidus & eo magis ſi quoque humidus, qui tranſpirationem impediendo ſerum cumulat, & motum ſanguinis retardat; unde lentor & viſciditas: hinc paludoſorum & lacuſtrium locorum Incolæ magis hoc morbo obnoxii obſervantur: nimis quoque calidus ær, ſubtiliores per ſudorem exturbans partes, humores inſpiſſat, aut jam craſſum ſanguinem cum impetu verſus cerebrum nervoſque adigit: porro Vaporibus Mineralibus, Saturninis, Antimonialibus, Mercurialibus, Arſenicalibus refertus, aut exhalationibus à conclavi recenter calce obducto impurus; quæ ſanguinis temperiem coagulatione, vel violenta fuſione mutant. Exempli loco eſſe poſſunt Metallurgi, Foſſores, Aurifabri, Figuli &c. Forte Syderum influxus & Lunæ præprimis addendus foret, cui neſcio, quos admirandos effectus & ſtupendam vim in Corpora animalium & plantarum tribuere allaborant Veteres: quoniam autem tota illa res ſatis precaria infirmo ſtat talo, & Lunæ ne quidem Eclipſum Totalium inſignis operatio hætenus obſerva-



observata est, potius contrarium experientia firmat, & illud Fabulam sapit : suis igitur hæc relinquimus Authoribus, cum erudite & solide jam sint refutata ab Excellentissimo *Sturmio in Dissert. de Syderum Influentia*, aliisque hujus seculi Aletophilis. Pergimus ad reliquas causâs, è quibus Cibus erit, nimirum crassus, viscidus, frigidus, quales sunt pisces, Ostreæ, pleraque aquatilia; è plantarum censu Olera, Fructus horæi & Legumina; reliquorum Animalium partes hujus farinæ, ut intestina, viscera, tendinosa caro &c. Hæc chylum præbent crudiores, ex quo talis Sanguis. Potus Vinum Generosum, Spiritus Vinaliaque potulenta fortiora, quæ turbas sanguini movent; inebriativa enim & narcotica sua vi Spiritibus haud patrocinantur, quod ex sensus, motus, locutionis, memoriæ & rationis privatione; sive stupore corporis & mentis illorum, hisce abutentium, colligi potest. Aqua nimium frigida & glacie refrigerata, liquida alia, potissimum si immodice talibus utimur. Atrum adjicere calculum possunt excessus in somno & Vigiliis crebriores, qui cruditates cumulant. Narcotica, quæ in manus imperiti merito audiunt gladius in potestate furiosi, spirituum motum sistunt. Saturni Saccharum, Mercurius & Mercurialia, inunctio ejusdem, aliaque Medicamina infeliciter adhibita, sanguinem crassum nervis impellunt. Nimium otium aut motus vehementior, diuturnior. Venus frequentior, sanguinis jactura major, fluiditatem, volatilitatem privatione, sanguini subtrahendo peccant: aut è contra suppressio consuetæ evacuationis ex. gr. Mensium, Hæmorrhoidum, Lochiorum, humores excretioni destinatos retinendo, nocet. Animi graviores motus, Ira enim cum impetu fluidas corporis partes in vasa protrudit; Tristitia, Metus, &c. lento sanguinis circuitu crassiores particulas generando & augendo pertinaces alunt obstructions, si præsertim frequentia & enormitas accedit. Conformationem solidarum destruunt, Vulnera telo & globulis tormentorum, aliisque instrumentis, Cerebro vel ner-



vis inflicta, hos discindunt, aut lacerant. Fracturæ ossium Cranii, Vertebrarum, vel Artuum, ut etiam depressiones ex ictu, casu &c. nervosum genus comprimunt. Contusiones violentæ, præterquam quod tenerrimis fibrillis nerveis vim faciunt, vascula quoque sanguiflua rumpunt. Notatu est dignum, ut plura hinc inde leguntur exempla, non latus percussus, sed oppositum quandoque paralyticum fieri: quod eam ob causam accidere nobis persuademus; quoniam vasa Cerebri anastomosi communicant, Sanguis è concusso latere in contrarium impetu propellitur, & quia in cerebro tenuiores canaliculi isti existunt, facile extravasatio, hancque excipiens compressio ibidem oritur. Luxationes majores Spondylorum medullam spinalem in totum comprimunt; minores verò tantum angustiores reddunt: luxari autem per totum eorundem tractum i. e. à Capite ad Os Sacrum possunt, neque hoc & reliqua ab istiusmodi externa vi tuta erunt. Hæc singula Spirituum ad organa transitum inhibent.

IX. CAUSÆ INTERNÆ REMOTÆ plures numerantur, prima est Sanguis serosus, viscidus & sale peregrino imprægnatus, qui particulis suis crassioribus, aut majoribus globulis, vel à figura Sphærica multum abludentibus, angulosis & irregulari superficie asperis, obstruit in totum aut ex parte arteriolas superius descriptas, sive glandulas Corticis & Medullæ, sive ipsa denique filamenta nervea, forte non raro hæc omnia. Non multum à Vero nostra opinione aberrabimus, si polyposam concretionem, qualis sæpissime in corde & vasis vario morbo defunctorum, à prosectoribus detegitur, etiam causis nostri affectus annumeramus. Non enim coagulatum post obitum demum sanguinem esse, ex eo apparet, quod Substantia polyposa congeries superpositarum extensarumque pellicularum observetur, quæ diductæ, sua Elasticitate in se redeunt; laceratæ vero, in oblonga & solida filamenta abeunt: aqua porro calida omnem adhærentem sanguinem eluit, illasque albicantes relinquit,



linquit, quod aliquoties ipsimet facto periculo, observavimus: hæc autem Cruori nequaquam competunt. Generatur hic intestinus hostis à sanguine fibroso, acido quodam coagulato, qui fluorem & compagem, deficiente partim motu intestino partim progressivo, amisit, unde facile quædam particulae conjunguntur, quibus pededentim aliae adhærent, originem suam petentes ut plurimum ex ipso corde, quod nimirum crasso humore nimis dilatatum, aut ex debiliore spirituum fluxu, solito impotentius, non omnem quem recepit, rursus excutit liquorem; hinc columnulis & papillis prædicta corpuscula agglutinantur: progressu postmodum temporis, sumpto incremento, ex ipsius ventriculis auriculisque prorepunt; modo unam modo plures occupant arterias, sursum deorsumque Polypi tendentes, vel ad vasorum per foramina Capitis ingressum, viam Sanguini angustiores reddunt; aut ulterius ascendentes etiam capillaria arteriæ occupant, & sic liquoris vitalis fluxum morantur: debilem proinde pulsum, alluentem insuper impurum & parciores sanguinem, Spiritum quoque rariorem, minusque defæcatum, aut nullum generare, non est dubitandi ratio. Eadem corpora quandoque etiam sinus & venas occupant, & sanguini refluxum prohibent. Si conjecturæ adhuc locus esset, non adeo forsan impossibile erit, polypos præsertim fracosos, quales subinde observantur, à concitatori quacunque demum ex causa, sanguinis motu rumpi, hujusque pulsu, divisas portiones arteriolis intrudi posse; unde sat notabiles oriuntur obstructions. Quæ tamen cum longe exactius tractentur ab Excellentissimo D. D. Scheidio in *Dissertat. de Polypo Cordis*; Malpighio in *Tractatu de eadem materia*, & Wepfero de *Apoplexia*. B. L. eo remittimus. Sanguis porro copia vel impetu perrumpere arterias, & serum lymphatica, in cerebro valent: hinc inundatio & canaliculorum nervorum compressio: acrimonia quoque valde acutarum spicularum tunicas vasorum erodere, eundemque effectum producere possunt: humor autem sic extravasatus inter

Cranium



Cranium & Meninges stagnat; vel inter crassiore & tenuiorem Membranam cumulat, vel ipsius Cerebri & ventriculorum Substantiam humectat; aut involucrorum Medullæ Spinalis interstitia occupat; aut denique ipsam immediate alluit. Tumor & calculus tandem tubulos constipando agunt. Tumorem quod attinet, notabile hujus in Cerebro nati exemplum *Felix Platerus in Observationibus* tradit, dum hominis mentionem facit, qui, post Cephalalgiam diuturnam, oculorum luce orbatus, tumorem glandulæ sive strumæ similem in ventriculorum anteriori parte gestabat; propria hic membrana cinctus, duriores materiam continebat: pondere suo quatuordecim drachmarum opticis nervis incumbens, hos ita compressit, ut omnem oculorum usum sustulerit; dum interim nec nervi neque oculi ullam labem ostendebant. Quis jam in dubium vocare audebit? in aliis Cerebri partibus ejusdem generis Schirrosos tumores aliquando exoriri; aut obstructas glandulas in Spinalis etiam Medullæ suprema, media, vel inferiori parte comprimere canaliculos nerveos posse. Tactus denique fidem facit, glandularum & vasorum tumores quandoque in partibus nostri corporis præsertim Scorbuticorum, pressione nervorum, musculos spirituum influxu privare. Calculum quod concernit, numerosas equidem observationes hujus in cerebro inventi scriptis suis annotarunt Authores; quoniam autem partim rudiori minerva, omissis potioribus circumstantiis, rem descripserunt, partim nonnisi visum, inventorum judicem adhibuerunt; lapillos unquam in Cerebro natos, haud absque ratione in dubium trahit, aut rarissimis imo tantum non monstrosis a numerandum censet, nunquam satis laudandus Celeberrimus D. D. Scheidius, Præceptor noster fidelissimus, in *Questionibus Physico Medicis de duobus Officulis in Cerebro Apoplexia extincta repertis.* / Licet solidiora in brutorum Cerebris aliquando inventa, calculi vesicæ urinariæ & bili feræ familiares, aut pulmonibus, aliisque partibus non penitus insoliti, denique ventriculi Capræ Persicæ hospites, proba-



probationis aliquam speciem præ se ferant, lubricum tamen ab uno ad aliud argumentum esse, exponit. Ossium potius è familia, duriora ista Cerebro ejusdemque membranis ut plurimum innata, esse, sequenti experimento convincit: Ossicula enim, cultelli acie rafa, fibrillas reliquorum ossium simillimas ostendunt: has enim ossium compagem efformare, præter inermis oculi, aut Microscopio armati testimonium, (observante Leeuwenh. p. 200. plura nimirum tubulorum alia aliis majora genera os complectitur) easdem etiam ductilitas eorundem insinuat; propter has fibras in schidia & non infrusta ut lapides friabiles dissiliunt: ramenta insuper prunis injecta, fumum fœtore sociatum, ossibus tantum combustis, lapillis vero nequaquam familiarem, emittunt.

X. PROXIMA CAUSA est denegatus spirituum influxus, & quidem in Nervos Capiti subiectis partibus prospicientes (Musculis puta artuum, ventris medii & infimi, qui à Medulla Spinali potissimum derivantur, licet Par Intercoastale per totum descensum cum nervis spinalibus communicans etiam patiatur, tamen aliquo adhuc modo intestina & viscera hoc irrigata officium præstare possunt) Paraplegiam infert; in alterutrum tantum latus abeuntes Hemiplegiam; in speciales corporis partes se insinuant, particulariorem generat paralyfin; qualis est Palpebrarum, Oculorum, Faciei, Linguae, Gulæ, Capitis, Cervicis, Brachii, Pedis, Digitorum, Spinæ, Vesicæ, Ani &c. A totali spirituum influxu prohibito, Perfecta dependet: Imperfecta verò à diminuto eorundem incurfu; eoque plus motus & sensus restabit, quo minus idem erit impeditus; major autem remora injecta, omnem aufert motum, manente solo sensu: hic enim sensibilis tantum objecti quædam impressio est, quæ sine spirituum nisu aut elatere singulari ab organo externo ad sensorium usque commune continuatur atque propagatur: cum ad motum contra eorundem vegeta magis expansio à principio nervorum ad illorum usque extremitates exigatur, adeoque spiritus pauciores ac torpidiores ad sensum sufficiant, imo ab objectis externis conciten-



citentur. *Bohn. in Circ. Phys. Anat. p. 325.* Alia fere est conditio nervorum, qui in Organa reliquorum sensuum excurrunt: hi enim minorem quoque læsionem sine notabili sensus vitio haud ferunt; molliores enim sunt, & tantum duo Naribus destinati cernuntur, qui in tenui & papillosa carne terminantur: totidem observantur Optici, qui in Retinam, Uveam & Corneam expanduntur: gemelli Auditorii in Labyrintho terminum attingentes, in tenuissimam membranam extenduntur: quatuor autem Gustatorii numerantur, duo quintæ & nonæ conjugationis, qui in papillas Linguae à Malpighio detectas potissimum Sphæricas abeunt: ad cutem è contra plurimi ramuli nervorum tendunt, copiosissimis papillis in hac luxuriantes, unde non tam facile Tactus undiquaque perit. Si igitur supra expositi nervi vitium contrahunt, Olfactus & Gustus hebetudo, Visus debilitas & Auditus difficultas sequitur: si vero penitus spirituum irradiatio cessat, hi sensus penitus abolentur, unde nullus Gustatus, neque Odoratus, Cæcitas & Surditas. Rara est avis, Tactum tantum aboleri, motu superstitè; cujus tamen exempla nobis suppeditant *Cornelij Stalparti van der Wiel Observationes Rariores T. 2. p. 433.* Mulieris enim partium externarum superficiem marmor frigore non vincebat, utut membra satis moverentur. Rigida passim & instar pellis, qualis tympana sonora reddit, dura, nihil fere sensus reliquum habebat: & paulo inferius. Sed nec immemor sum cujusdam Viri, qui graviore affectus Scorbuto, ex India Asiatica huc percurandus venerat; cutis sensu usq; adeo erat obtuso, ut vel prunis usta nullum sentiret dolorem, huic autem subjectis partibus pungentia, acrioraq; satis afferebant doloris. *Fernelius Pathol l. 5. c. 3.* refert ex Vinolentia cujusdam corpus undique stupuisse, motu tamen illæso: causam eleganter explicat *Bohn in L. c.* Si tactus perit in cute, vegeta satis adhuc facultate musculorum ipsi subjacentium, causa in organo tactus scil. nerveis papillis, per illam dispersis hæret. Stupore ejusmodi affecti observantur Leprosi, Elephantiaci, & Maniaci nonnunquam, quibus vel à causa morbifica, vel ab injuriis frigoris diutius latis, cutis induratur, ejusq; corpora papillaria ad stuporem usq; rigescunt.



Glandulæ enim cutis miliares irrigant papillas, ne aridæ aut callosæ reddantur: hinc in locis ubi exquisitus est tactus, copiosæ etiam notantur glandulæ; quod si hæ obstruantur, papillæ exsiccatae stuporem producunt. Paralyfis post Apoplexiam, provenit vel à Metastasi humoris extravasati ad Medullam Spinalem; vel potius quia hic morbus omnimoda sensus & motus privatio est, ab universali obstructione aut compressione dependens: si igitur beneficio naturæ & medicamentorum quædam sive potiores viæ rursus aperiuntur, reliquis manentibus occlusis, necessario paralyfis sequitur. Morbus Lethargo superveniens facile explicatur, dum nimirum in hoc à crassiori sanguine pori multum jam sunt obstructi, quid miramur, si magis aut penitus infarciuntur. Ex Epilepsia, Convulsionibus, Arthridite, Colica, Scorbuto, Lue Venerea, haud difficulter deducitur; hi etenim affectus dependent à vitiosis, præsertim acribus, acidisque humoribus; Cerebrum & Nervi certe ab his immunes non erunt, dum sanguis qui totum peragrat corpus, etiam has alluit partes, ibidemque obstructiones parit. Catarrhus nihil aliud est, quam serum in glandulis & vasis, propter destructam fluiditatem, stagnans, & Icterus itidem sero coagulato peccat, propterea hi quoque affectus ansam Paralyfi præbere possunt. Abscessus tandem vel copia puris vel acrimonia nocet.

XI. Proximum jam erit, ut illa etiam adjungamus, sine quibus cognitio morborum perfecta esse non potest. Tum ad ipsorum enim morborum dignotionem, causarum & loci affecti notitiam, tum ad ipsam curandi rationem, per multum est scire **SIGNA DIAGNOSTICA**. Affectus igitur propositi species nobis significant motus & quandoque etiam sensus privatio, inordinatus & debilis pulsus, cum membrorum frigore, pallore, laxitate, atrophia sive extenuatione, urina alba, tenui & pauca: hæc si occurrunt signa in partibus infra caput ad extremum pedis, cum non raro afflictâ respiratione, Paraplegiam indigitant. Si jam memorata Signa in alterutro latere notantur, cum aliquando oculi partis affectæ diminuti-



one, visus hebetudine, auditus difficultate, oris nasique tortura, linguæ etiam imbecillitate, Hemiplegiam dextri vel sinistri lateris demonstrant. Motus aut etiam sensus deficiens, cum frigore, pallore, laxitate, tabe, in parte tantum aliqua Corporis Humani ex. gr. brachii, pedisve musculis, pulsu insuper minori, inæquali, particulariorem insinuant Paralytin; & quidem si integra pars laborat, absque spasmō, hoc vero conjuncto, si antagonistæ solum aut magis afficiuntur. Non autem infrequens esse solet, hæc recensita Signa simul cuncta, atque in extremo gradu non semper adesse; in uno enim corpore cumulata Perfectam nobis delineant Paralytin; sed nunc motum magis, nunc sensum potius desiderari, quæ Imperfectam adumbrant; non raro utrumque aut alterutrum diminutum saltem restitäre, quæ Stuporem nobis ostendunt: hoc adhuc observandum superest, si sensus tantum aufertur, membra non, sicut motu destituta, contabescere, sed succulenta permanere, soliditatem musculos & pulsum actionem suam retinere, ob ingressum spirituum animalium haud interruptum; cutim vero algere & quandoque duram rigere. Signa Causæ desumuntur & quidem Externæ, ab ægrotantis adstantiumque relatione, ab errore enim in usu sex rerum non Naturalium commisso, aut alio accidenti dependet. Si vis quædam externa præcesserit, signa vulneris, fracturæ, luxationis &c. visui & tactui se offerunt. Internam & remotam, Sanguinem nimirum serosum sive serum visciditate & copia aut utraque peccare, patefaciunt Habitus corporis pinguis, Dispositio hæreditaria, ætas senilis, sexus debiliior, aër humidus & frigidus, cibus & potus refrigerans & humectans, otiosa vita, evacuatio immoderata aut etiam suppressa, tristitia, curæ, dolor capitis gravativus, muci & salivæ copia, superficies corporis pallida & frigida, pulsus parvus & debilis, urina aquea, molestia ex frigidis & humidis, prægressus aut adhuc præsens Catarrhus, Hydrops, Icterus. Sanguinem copia & impetu nocere, oculis sistunt habitus corporis plethoricus, venæ tumentes, æstivum tempus, cibus & potus laudabilis & largus, etiam calidior, suppressio solitæ excretionis



tionis mensium, hæmorrhoidum, quies aut motus nimius, facies rubicunda, pulsus plenus, levamen ex missione sanguinis, anteambulo apoplexia. Acrimoniam humorum notamus ex usu aëris marini sive acrioribus referti vaporibus, cibi falsi & potus minus blandi, vini videlicet austeri & acidi, ut & talis cerevisiæ, ex siti, salivæ, sudoris & urinæ acrimonia, ex morbo præcurrente aut adhuc concomitante, convulsionibus, arthridite, scorbuto, colica, lue venerea. Paralysis ex Scorbuto, Colica, aliquando inconstans modo hanc modo aliam infestat partem, remittit, redit, doloremque conjunctum habet. Polypus equidem nonnisi obscure, atque minus certe cognoscitur ex pulsu debili, inæquali, tardo, parvo, tremulo & intermittente, adjunctis cordis angustia, tremore, palpitatione ac difficili respiratione nonnunquam. Tumorem facilius in partibus corporis tactui expositis, ægrius in Cerebro ejusque appendice, & non nisi probabiliter ex dolore fixo ac gravativo, ut etiam ossicula, quandoque tamen plane indolentia nullo modo augurari possumus. Partis affectæ signa hæc fere proponuntur : si omnes sub capite partes resolutæ sunt, & ipsum caput ab omni labe non immune, Cerebrum ; si caput à resolutione liberum, Medullam Spinalem laborare divinamus : si alterutrum latus ægrotat cum parte capitis, Hemisphærium Cerebri ; Capite vero sano, partem Spinalis Medullæ pati, manifestum erit. Si dimidius corporis truncus inferior nimirum affectus, Dorsalis Funis portionem labefactatam novimus. Si quoddam tantum membrum sive Organum debilitatum, in nervo isti prospiciente, & dum cutis torpet, in papillis ejusdem vitium quærendum esse remur.

XII. Properamus nunc ad SIGNA PROGNOSTICA, quæ, si rem, bene nimirum ex his judicans, acu tangit Medicus, in cœlum fere extollunt ; si vero enormiter aberrat, ad inferos magna cum ignominia deprimunt. Cautione igitur opus est, ne ineptis & immaturis vaticiniis ægrotanti noceamus, famamque risui exponamus : & hoc potissimum in acutis Antesignanus noster observatione dignum serio incul-



cat; in hoc tamen Morbo paulo cordatiores esse prædicendo licebit. Imminentem affectum prævidemus aliquando ex stupore crebriori, cum sensu formicarum repentium in corpore, vertigine, lassitudine, tanquam prodromis; licet sæpius inadvertentibus ingruat. Cæterum affectum hunc pronunciamus Chronicum h.e. diuturnum, qui per plures, quinque, decem, viginti & ultra, annos protrahitur. Porro & quidem vix ullo contradicente est malum curatu ut plurimum difficile, sæpius enim illud valet, Non est in Medico, ut æger semper releveretur, interdum enim contumax malum, plus valet docta Arte: angusta nimirum vasa & molles glandulæ arctissimique pori cum filamentis tenerrimis, medicamentorum etiam nobilium efficaciam crebrius eludunt, & hæc istis damnosa potius quam proficua existunt. | In specie vero Paraplegia reliquis pertinacior, ad vitæ usque terminum, nunc citius nunc tardius obvenientem, ut plurimum ægrotantes comitatur; pejorem adhuc volunt, si excrementa fæces nigrum & urina sponte elabuntur. / A priori parum fere differt Hemiplegia, in primis si motus sensusque insigniter læsus est, cum frigore, tabe, laxitate, debili pulsu: quiescente enim per necessitatem corpore, sanguis tarde & debiliter circumagitur, nulla sit debita alimentorum concoctio, nulla excrementorum sequestratio & exclusio legitima, unde obstructions augentur. Curationis spes major affulget, si partes pauciores minusque nobiles, aut quædam tantum & quidem leviter, aut sensus solus affligitur; prædicta potissimum si exulant mala omina: Gulæ tamen resolutio etiam sola, satis periculi minatur, quoniam alimentis viam præcludit. Principiis si obstamus, de recentis cura non est desperandum, sero autem Medicina paratur, si mala per longas moras invaluerunt: obstructions enim inveteratas referare summæ difficultatis res est. Facilius quoque restituimus æstate & juniores, ægrius hyeme, imo vix senes: si malum in juniores, qui nondum corporis perfectionem attigerunt, sed adhuc crescunt, cadit; membra paralytica minora & debilia manent, dum sana reliqua duplo fere robore & magnitudine augentur:



tur: ab organis enim chyli & sanguificationis pro integro corpore nutrimentum præparatur, quod, quia in ægrotantium membrorum comòdum verti non potest, sanis applicatur. Ex Caro, Lethargo, Apoplexia &c. gravior est affectus, ex Scorbuto aliquando vagus & inconstans, & ex Colica levior sanatu. Supervenientem Febrem & Tremorem salutant Medici, & eo magis ægrotantes, si auxilium ferunt. A Causa externa inevitabili, continuo afficiente, de restitutione haud cogitandum: ab ictu, casu graviore, luxatione vertebrarum notabili, nervorum insigni vulnere aut læsione, tumore schirroso, incurabilem pronunciamus morbum: à causa interna vehementiori obstructione, compressione ab extravasatis, in corpore Cacochymico, valde Scorbutico, intemperante ægro conclamatum est: quamvis rudimenta polyposæ concretionis ab ipsius sanguinis meliori dispositione, vel à medicamentis mature adhibitis dissipari rursus queant; annosum tamen majusque tale productum, omnem spernit auxiliorum efficaciam: idem quoque prognosticum de officulis valet, quorum materia nondum indurata, facile iisdem forte subsidiis fugari potest, soliditate vero jam adepta, nulli certe remedio locum concedit. Hoc adhuc annectere possumus, quod raro in alios hic degeneret morbos, crebrius vero ab aliis provenire solet, ut ab Apoplexia, Lethargo, Epilepsia, Convulsionibus, Catarrhis, Colica, Arthridite, Scorbuto, Lue Venerea, Inflammatione, Abscessu, Vulnere, Contusione, Hydrope, Mensium, Lochiorum, & Hæmorrhoidum suppressione, etiam Dysenterico fluxu præpostere inhibito, Suffocatione uteri, Ulcere antiquo infelicitè curato, Ictero, Morsu animalium venenatorum &c. Sæpius tandem ultima linea rerum Mors, Marasmo, Sudore Colliquativo, Apoplexia &c. Tragediæ finem imponit.

XIII. Quamvis neminem lateat, contra mortis vim non præparari Medicamen, & ideo omnibus & singulis calcandam esse viam Lethi; quilibet tamen id momenti quod restat vitæ, sanum transigere exoptat, Summo propterea studio (quod officium nostrum esse credimus) eò laboramus, ut  
apto



apto & convenienti remedio, ægrotanti vel pristinam sanitatem ex toto, aut si pertinax malum vetat, saltem ex parte restituendo; vel ne universum subjuger corpus, justoque citius interimat affectus, impediendo, opem feramus. Partem igitur nostri muneris absolvimus, si hunc morbum metuenti, aut jam afflicto DIÆTAM seu Regimen sex rerum non Naturalium serio commendamus; quantum enim exacta hujus observatio referat, ex eo patet, quod optima Medicamenta, ista neglecta, incassum adhibeantur. Quærant ideo sibi ærem temperatum, purum; frigidum tegumentis & vestimentis arceant, humidum vitent, aut suffimentis, succino, thure &c. igneque luculento juniperino ligno corrigant; à Ventis Austrinis etiam Borealibus corpus muniant. Cibus sit boni succi, facilis digestionis, ut panis laudabilis, bene fermentatus & coctus, caro vitulina, hædina, vervecina assa potius quam elixa, ferina juniorum &c. Volatilium, columbæ, gallinæ junioris, avicularum sylvestrium; piscium tamen parcius & rarius usus ex. gr. Truttarum, Luciorum, imo Gammarorum &c. Ex plantarum numero endivia, lactuca cocta, cichoreum, apium, etiam dulce, brassica prolifera florida, asparagi, lupulus, spinachia, mala aurantia &c. aromata & aromatica, sinapi, in condimentis moderate conveniunt. Parum emolumenti, plus vero damni sentient ex cibo crasso, viscido, frigido, ut carnibus salitis, fumo induratis, pane biscocto, hælecibus sale conditis, fumatis, asellis, ostreis aut conchis &c. caseo, oxygala, acetariis copioso aceto præparatis, fructibus horæis, castaneis, fungis, rapis, cucumeribus, melonibus, oleribus crudioribus, leguminibus, bellariis, saccharatis, mellitis &c. quorum si catalogum hic recensere animus esset, pagellæ in Tractatum excrescerent: hæc tantum exempli loca posita sunt, sagaciores reliqua facile ex his dijudicabunt. Potum sibi eligant blande calefacientem, aperientem, ex. gr. Vinum mediæ ætatis & virium, salviatum in hoc affectu egregium, aut vere vel ineunte æstate convenientibus herbis medicatum, cerevisiam bonæ notæ, aromatizatam, rorem marino &c. conditam: neque excludendum simplex, tamen optimum



mum nutrimentum aqua limpida, levis, pura, dummodo ut in reliquis frigus inimicum illud cerebro & nervis absit: hinc non possumus non detestari potum glacie, nive, aqua gelida refrigeratum: quam egregie enim ille operetur præsertim in non assuetis, quotidiana loquitur experientia. Qui sorbillo potius, quam plena hauriendo gula, bibere amant, potum Thee atque Caffè sibi commendatum habeant. Proscribimus quoque Vinum nimis generosum, spiritum vini, vinum acidum, austerum, cerevisiam talis notæ, omniumque esculentorum & potulentorum immoderatum & illegitimum usum. Sequitur jam Somnus, quem nocturnum & moderatum volumus, ne cerebrum gravetur; vigiliæ suam quoque observent legem. Corpus, quantum quidem potest, exerceatur, & præstat motu excedere, quam nimio otio situm contrahere. Transpiratio sit non interrupta; sudor moderatus prodest; urina liquidis ingestis debita quantitate respondeat; alvus conservetur lubrica; mulieres mensium habeant rationem: robustioribus adhuc & junioribus in leviori affectus specie Venus licita est; aliquando enim hanc Medicinam fuisse confirmat Boyle de Util. Philos. experim. p. 145. Puella octodecim annorum, quæ in partibus corporis sui externis omni tactus sensu adeo destituebatur, ut citra vel minimam commotionem, nudæ cervici ejus sudariolum aciculis affigere valuerit, ipsa vero neuiquam spiculis observatis, quin & eorum ignara sursum ac deorsum collum commoverit. Harvejo tandem suspicionem injecit, admirandum hunc morbum Uterinum ac proin exercitiis hymenæis sanabilem esse, quare parentibus ejus (qui eam non ob egestatem ad Nosocomium ablegarunt) ut filia domum accersita de thori socio prospicerent, eventu sane prognosticum exaquantem, author fuerit, sicq; misellam, à malo hoc stupendo liberaverit. Animi Pathematibus, quousque imbecillitas humana permittit, assuescant gaudio, lætitiis; repugnent Iræ, Tristitiæ, Metui, Terrori; fugiant Curas, Sollicitudines, Meditationes profundiores & continuas: licet Observationes mentionem faciant quorundam, vehementiori Ira, Metu curatorum, Johan. Schenck. Observat. Medic. Rar. p. 94. Quis autem usque adeo audax & temerarius ancipitem curam subeat?



qua plures gravissimis morbis, ipsaque morte correptos experientia testatur. Cum autem mens humana infinitarum rerum non sit capax, diffusas hasce regulas, tritis versiculis memoriæ gratia includamus.

*Est modus in rebus, sunt certi deniq, fines,  
Quos ultra citraq, nequit consistere rectum.*

XIV. Alteri jam Officii parti satisfaciemus CURA, auxiliiis Chirurgicis & Pharmaceuticis. Agmen merito ducit Generale illud Plebi maxime probatum Venæsectio, quam in affectu ex ictu, casu, modicam; in Plethoricis, mensium & hæmorrhoidum suppressione, largiorem laudamus: apud timidiusculos & Venæsectionem abhorrentes Cucurbitulæ cum scarificatione substitui possunt: in aliis tamen casibus, sanguine minus abundante, caute abstinendum ab hisce arbitramur. Vesicatoria, Cervici & post aures applicata, serum abundans evacuando; & Fonticuli, non in parte affecta sed sana, brachio nimirum vel cruri inusti, aliquid præstare possunt. Quoniam autem sæpius non solum Cerebrum, sed universum corpus noxiis turget humoribus, hisce vero non exturbatis, frustraneo conatu, simulque tristi non raro eventu, dum vitiosam istam materiam ad cerebrum nervosumque genus adigimus, optima etiam alias medicamina applicamus. Quo igitur secundum Methodum procedamus, propinentur prius proprie sic dicta Purgantia, & quidem ubi conveniunt Emetica ex.gr. radix Asari, Gummi gutta, Mercurius vitæ, Tartarus emeticus, crocus Metallorum & antimonialia reliqua. Ubi hæc minus apta sunt, purgantia per alvum mitiora sive Lenientia frequentius usurpentur ex.gr. Manna, Pulpa Cassiæ, cum Cremore aut crystallis Tartari &c. & quoniam chronicus est affectus non inepte sacculos aut nodulos purgantes, aperientibus temperatos, commendamus. Jam si hæc mitiora nihil proficiunt, fortiora in usum vocanda; nam humor viscidus ac turgens talia fere requirere videtur, ex.gr. Sennam, Aloën, Rhabarbarum, Jalapam & Jalapina: quæ si opus, acuantur Helleboro nigro, Colocynthide, Scammonio & Diagrydio &c. Quoniam Casus quandoque obveniunt, quibus his minus commo-



commode uti licet, non sine fructu tum applicamus Clysteres emollientes, abstergentes, stimulantés, adjunctis supposito-riis. Cuncta tamen hæc pro artis legibus, quas hic recense-re non vacat, mutari, intendi & remitti possunt ac debent. Liberato sic corpore maxima ex parte à superfluis & molestis oneribus, cum spe majoris successus adhibentur Caput pur-gantia, & quidem Naso Errhina, ex sequentibus, ut etiam Ptarmica, parata; Rad. Helleb. albi, Acori, Pyrethri, Irid Flor; Herb. Major. Salvia, Puleg. Nicotianæ, Hyssopi, Fol. Lauri; Floribus Lil. convall. Lavend. Seminibus Nigell. Nasturt. Sinapi; Cubeb. &c. & ex his compositis aut præpa-ratis pulveribus, aquis. Apophlegmatismus glandulas sali-vales & membranam pituitariam, copioso & sæpius viscido humore emungens, ex sola Mastiche vel jam descriptis Ca-putpurgiis concinnari potest. Porro Medicationi insisti-mus, aut omissis etiam prioribus & reliquis, statim propera-mus ad Sudorifera, ubi nimirum corpus vitiosis fluidis copio-sisque minus turgidum offendimus: facile enim plura alia su-perant, multis nimirum magnisque comòdis, quæ non solum in hoc, sed aliis etiam affectibus, Corpori humano inferunt: massam enim sanguineam fere coagulata[m] dissolvunt, tardius motam fluidiorem reddunt, obstructions per minimos se in-sinuando poros referant, minus congrua quæ inveniunt, insi-gni totius emolumento, per Universi cutis spiracula ad auras ablegant: in horum vero censum sequentia veniunt, Rad. Angelicæ, Gentianæ, Carlinæ, Zedoariæ, Chinæ, Sarsaparil-læ, Helenii; Herb. Carduus Bened, Scabiosa, Fumar; Flor. Anthos, Croci; Fructus Juniperi, Sambuci: Ligna Guaja-cum, Sassafras; Camphora, Myrrha; CC. Unicornu, Bezoar, Castoreum, Oculi cancri; Bolus Arm. Corallium, Succinum, & ex his aliisque fere innumeris, præparata, Aquæ Simples & Compositæ, Spiritus, Syrupi, Conservæ, Extracta, Salia Volatilia & fixa, olea, & decomposita infinita fere, junctis Theriaca Andromachi & Mithridatio Damocratis. Affinia prioribus Diuretica, longe inferiori loco haud ponenda sunt: quandoque enim ita constituti homines occurrunt, in quibus

D 2

ægre



ægre sudor movetur; ubi hæc non incongrue substituuntur: ex horum familia sunt Radices quinque Aperientes majores & minores; Hedera Terrestris; Baccæ Alkekengi, Amygdalæ amaræ; Terebinthina; Aqua Fragorum, Alkekengi; Spiritus Tereb. Nitri, Salis, Vini, Tartari; Oleum Juniperi, Amygd; Pulvis Concharum & Testarum; Sal Commune, Gemmæ, Ononidis, Tartari, Stipitum Fabarum, Nitri Fixum; Arcanum Duplicatum, Tartarus Vitriolatus, Terra foliata Tartari &c. Dubitant, an his vel illis aut utrisq; a numerandæ sint Acidulæ, insigni certe efficacia multis haud posthabendæ: præter enim quotidianam Experientiam, summis celebrantur laudibus à non infimæ sortis Medicis, *Joh. Dan. Horstio; Melch. Sebizio; Joh. Theodoro Tabernamontano; Rein. Solenandro &c.* Ad miraculum enim usque crebrius operantur. Hinc, nisi pulmonum vitium aliudque notabile obstaculum impediat, & tales adhuc vires supersint, quæ corpus movere valeant, hoc quoque auxilii genus in succum sanguinemque fundant ægrotantes.

XV. Non autem ejusdem generis armis Medici eundem & rebellem impugnare solent hostem; sed teli mucrone hebetato aut fracto, arripiunt ensen, vel utrisque dimittunt. In remediorum serie, quibus Paralyseos excutere conamur, nunc se offerunt SPECIFICA Cephalica & Nervina; non quidem talia, qualia prima forte videntur fronte, ac si huic vel isti tantum parti convenirent, inque Artificis potestate esset, ad determinatam partem ex. gr. Caput, Nervum, hæc ablegare: sed quæ sanguini ejusmodi characterem imprimunt, ut Cerebrum Nervosque alluens, peculiarem præstet usum, quem tali modo non alteratus, nunquam attulisset. Sunt autem pleraque Volatilia Sulphurea & balsamica spirituosæ, aromatica, non exclusis volatilibus urinosis; *fixis enim & acetosis humoribus unice contrariantur urinosis, Paralyseos hinc specifica.* Celeberrimus *Georg. Wolfg. Wedel in Amæn. M.M. p.123.* Cæterum Sanguinem & serum tarde motum & fere stagnantem excitant, hinc simul spiritus protrudunt torpidos; poros Cerebri humores incidendo aperiunt; serumque super-



superfluum è corpore eliminant ; quædam una temperant acrimoniam. Generosa autem talia sunt. Rad. Calamus Arom. Galanga ; Zedoaria, Iris Flor. Heibæ. Salvia, Betonica, Majorana, Rosmarinus, Chamædris, Chamæpytis, Ruta, Serpillum, Lavendula, Pulegium, Melissa ; Flores. Croci, Anthos, Lil. Conv. Spicæ, Rosarum, Tiliæ ; Cortex Citri, Arant. Semina. quatuor calida majora, Coriandrum ; Aromata & Aromatica, & ex his composita ; additis ex succino, Castoreo, Cornu Cervino, Viperis, Sale amm. præparatis. Non prætereunda est Aqua Cephalica, cujus, ut plurimum aliorum Processuum, in Collegio Chemico anni præterlapsi, copiam nobis fecit, laudibus extollenda Benevolentia, Viri Amplissimi & Experientissimi Domini JOHANNIS BOECLERI Med. Doctoris & P.P. Celeberrimi, Fautoris mei summe colendi. Tandem *Speciatim Cinnabaris nativa & antimonij, quicquid nonnulli in contrarium objiciant, qui pro veneno eam reputant, est Specificum Cephalicum, sed magis Universale, quam ullum aliud, quatenus respectu suorum elementorum liquores vitales egregie corrigit. Wedelius. Am. M. M. p. 128. Idem Pharmacum palmis onerat Dan. Ludovicus in Pharm. p. 188.*

XVI. Quoniam autem vis unita fortior esse solet, supra expositis Internis associemus etiam EXTERNA sive TOPICA, quæ ad Sanitatis recuperationem hac Methodo, quandoque haud parum conferre possunt. Primo oculis se sistit Frictio Membrorum pannis aut linteis calidis ; hac enim partes calore foventur, pori referantur, sanguis propellitur, & spiritus ad majorem affluxum irritantur. Urticatio hanc sequitur, minus tamen priori commoda est ; præter enim quod dolorifica sit, insignemque tumorem excitet, dum pars affecta recentibus urticis uritur ; etiam liquorem salino-acrem sanguini, pauca licet quantitate, instillat : id quod testantur *Observationes Leeuwenh. p. 107.* Urticæ mox à nativitate aculeis cavis donantur, qui humorem quendam acrem guttatim stillant ; hic per foramen, ab acie aculeorum factum, sanguini instillatus, quamvis nullus aculeorum fractus in cute hæreat, dolorem, calorem & tumorem istum excitat, quem à



contactu hujus plantæ percipimus: recentes tamen & mediæ tantum ætatis urticæ hoc liquido turgent, inveteratæ aculeis equidem armatæ sunt, sed inanibus, unde sine noxa contrectantur: à quibus non dissentiunt, quæ nobis communicat *Anatomia plantarum Malpighij. p. 137. de aculeata Urtica Fig. 93. Intus Cava est hæc spina & succo referta; inducta cicatrice penetrando Urtiginem, & tumorem, fermentatione media, velut infusa aqua regia excitat.* Sed revertimur ad reliqua Topica, Caput Cucupha, aliasque afflictae partes Sæculis, ex supra celebratis Specificis Cephalicis consutis, involvamus. Membra suffitu ex Thure, Mastiche, Succino, Benzoë &c. foveamus. Neque omittendæ sunt Lotiones Capitis, præsertim, Occipitii, & artuum, aquis aut Spiritibus ex. gr. Spiritu Vini Camphorato, aliisque supra descriptis liquoribus leniter calefactis: unde nec Olea, & ex his Balsami cum Unguentis, Linimentis, Cataplasmaribus Nervinis spernenda veniunt. Numerum porro augere possumus pinguedinibus animalium, Cervi, Vulpis, Hominis &c. Colophonem imponamus Emplastris, si præsertim vis externa præcesserit; fingi autem possunt ex Gummi Animæ, Elemi, Galbano, Opopanace, Sagapeno, Terebinthina, Pice &c. Observatu dignum adhuc restat, enarrata Specifica Cephalica non semper & ubique convenire, sed potissimum si caput proprio vitio & nervi laborant: moderandus quoque est eorundem usus, ne excessu, sanguinis spirituumque turbemus motum, eosdemque irriteremus, unde major obstructio generari potest: neque hoc de Externis Cephalicis tantum, sed magis quoque de Internis antecedentibus valet. Priusquam hanc deferimus Thesin, necessitas efflagitat, insuper monere, ne Empyricorum consuetudine, Nervorum afflictorum insertioni, sed principio applicemus remedia, ibi enim fons & origo mali hæerere solet. Agmen merito claudunt verba Celeberrimi *Wedelij in A. M. M. p. 123. Sic curavimus hemiplecticos & paralyticos plurimos generali illa sive speciali potius Methodo: 1. dando quæ nervorum poros referant, 2. quæ spiritus animales confortant, 3. quæ acidum figens excutiunt, non omisissis externis unguentis nervinis & urticationibus.*



XVII. Jam in BALNEA descendimus, quæ quidem non ejusdem generis, sed in Sicca & Humida dispescuntur. Sicca fiunt, igne carbonum in peculiari fornace accenso, vel spiritu Vini, Juniperi, ardente, decocto herbarum convenientium fervido, quod si remittit, silicibus aut scoriis ferri ignitis resuscitatur, æger domunculæ ad talia fabrefactæ includitur, aut duplicatis tegitur linteis, & tali ratione sudat: licet incommoda quædam adjuncta habeat, quod nimirum multum fatiget, ut non raro animi deliquium superveniat; haud parum tamen utilitatis quoque continet, quod ex eo potissimum apparere potest, experientia docente, aliquando ægrôtautes in tali sudatorio, libero motu paulo ante paralyticorum artuum frui: ita ut spes affulgeat, iteratum tale, ab incunabulis statim morbi, omne malum, junctis subsidiis aliis auferre posse: alias enim veluti somnium, relicta tantum juvaminis memoria, fructus istiusmodi Balnei & quidem mox ab ejus cessatione transit. Hæc etiam Balnea Encomiis mactat *Etmüllerus Dissert. de Medic. Baln. Artif. p. 262. à morbo enim quocunq, si homo illum imminere sentit, illud Balneum non solum ut plurimum præcavet, sed etiam amissam sanitatem sapissime ægro restituit.* Humida nunc sequuntur, Semicupia ex decocto plantarum Cephalicarum &c. aliaque particularia cum fæcibus Vini, Vinaceis, Vino rubro &c. valde tamen dubito, morbum latum unguem hisce cessurum, ni causa mali hæreat in parte liquori immergenda. Thermarum nunc ebullientium lustremus virtutes; plurimi in eo conveniunt, quod laxis, humidis, ichorescentibus malis & subjectis similibus prosint; ita enim *Wedelius l. c. p. 279. sit v.g. æger Scorbuto frigido laborans, incipiente cachexia, laxitate viscerum, statione humorum, acore prædominante, nervis ab humore frigido, ab acido contractis & male habentibus, præsto sunt exiccandi & alterandi, quin & purgandi virtute, Thermæ.* Omnibus autem indiscriminatum convenire, damnum crebrius ex earundem usu contractum reclamatur; hinc inde enim testimonia & Observationes occurrunt, non solum Thermas non juvisse, sed rem in pejus quoque mutasse.

XIIX. Restat brevissimis monere, in Paresi ex Colica, Arthritide,



thritide, lenioribus purgantibus aut enematis tantum agendum esse, ut etiam in Paralyfi à Convulsionibus cautius mercandum; in affectu cum & à Scorbuto antiscorbutica reliquis convenientibus esse maritanda. In morbo ex ictu, casu, luxatione, contusione, vulnere &c. luxata reponenda, extravasata discutienda vel resolvenda, vulnera mundanda, aliisque Chirurgicis auxiliis curanda, bona Methodus suadet.

Hæc sunt BENEVOLE LECTOR quæ pro ingenii modulo conscribere animus erat; brevitatis interim Cultores, pagellas, nec Observationum multitudine, neque Opinionum copia, aut Controversiarum phalange multiplicare volumus; innumeræ enim sunt, nunquam finem habituræ: Veritatis potius Studiosi, quæ unica est & simplex, ex omnibus optima veroque consona selegimus, additis etiam propriis observatis, cogitatis, expertis. Neque hoc novum aut insolitum, nulliusque consilio factum reputabis, non enim nobis desunt Exempla Gravissimorum Virorum, qui eandem tenuerunt viam, aliisque calcandam suaserunt: innumera quibus obstrictus sum beneficia, aliis nunc præponere jubent Virum Amplissimum atque Excellentissimum Dominum MARCUM MAPPUM Med. Doct. & P. P. Celeberrimum, Promotorem meum omni observantia prosequendum. Prudenter enim monet in *Dissert. Inaug. Proæmio. Disputantis esse, non tam quid quisq; dicat, sed quid omnibus dicendum sit, videre.* Hoc equidem optimum Consilium sequuti sumus, an autem in omnibus & singulis exoptatum ejus finem simus assequuti, hæremus: perpensa enim rei difficultate, viriumque debilitate, de graviore uno vel altero lapsu nequaquam dubitamus. Memores insuper Universalis illius, *Errare Humanum*, à nemine alieni; agnoscentes præterea operum Mortalium cum *Ecclesiastico* imperfectionem, verissimo hujus Effato subscribimus. Homo autem, licet omnes laborando nervos intenderit, vix tamen primordia rerum attigit; & dum ad metam pervenisse sibi persuadet, multis adhuc Parasangis distat. Nemini enim Opera Divina exhaurire datum est; nam quis Omnipotentiam DEI dimetiri, aut admiranda ejusdem numerare valet?